



**A**

Tes fotos: parsore, zovins cu lis bandieris dal Friûl; sot, Carlo Puppo, puarte vòs dal Comitât 482.

**JERIN DOME IN TRÊ** - Paolo Menis e Mirko Špacapan de Margarite e Annamaria Menosso dai Ds - al incuintri informatif pai conseirs regionai inmaneât luns ai 16 di Lui te sede de Region di vie Sant Francesc a Udin dal Comitât 482, cu la colaborazion di esperts de Arlef, dal Cif de Universitât dal Friûl, dal Centri Friûl Lenghe 2000, di rapresentants dal mont de scuele e dai operadôrs linguistics di sportel.

Te suaze de discussion de gnove leç sul furlan - propi in chescj dis il Comitât strent metût in pîts li de seste Comission dal Consei regionâl dal Friûl-Vignesie Julie al à esaminât lis diferentis propuestis di leç, gjenerâls o di setôr, che a rivuardin la lenghe

furlane -, il Comitât, che al met adun associazions des comunitâts furlane, slovene e germaniche de region, al à pensât ben di meti adun propi chei che a son clamâts a definî i contignûts de prossime leç. «Cun chê di fâ clarece sui elements de politiche linguistiche, su la legislaçion di tutele, sul so grât di aplicaçion, par saltâ fûr di tancj prejudizis e stereotips che a zirin su la lenghe furlane, e spiegâ lis resons praticis e operativis che a son daûr de nestre domande di tornâ al test di leç su la lenghe furlane metût adun dai esperts e po modificât de Zonte regionâl», al à

sclarît il puarte vòs dal Comitât 482, Carlo Puppo. E «ancje par fevelâ de percezion che la int e à de lenghe furlane e des oportunitâts di vore leadis ae marilenghe, dant fûr par esempi la ricercje de Serling sui rapuarts tra leçs di tutele e svilup economic dal teritori, presentade di resint intune cunvi-gne a Colorêt di Montalban».

Al invît indreçât a duçj i conseirs regionai, a àn rispuindût in siet: trê a jerin presints, e altris cuatri, in forme delegade o cun justificazion, vâl a di Kristian Franzil di Rifondazion (president de seste Comission conseâr), Roberto Molinaro dal Udc, Claudio Violino de Leghe nord e Bruna Zorzini dai Comuniscj talians (fale par Špacapan, duçj chei altris a fasin part dal Comitât strent dal Consei regionâl). Fasint cuatri conts, tra chescj e i presints, al jere rapresentât pôc plui dal 10 par cent dal Consei intîr. Epûr i invîts a jerin stâts mandâts vie par timp, dôs setemanis e mieç prime dal incuintri «di servizi», stant atents a sielzi une zornade cence impegnis di aule. Difilic cjatâ scusis. La realtât le piture Franzil: «Chei che si ocupin tal concret di cheste materie a son une desene». Duncje, no si podeve spietâsi une partecipazion plui fuarte. Al mancual però, cuant che la leç e vignerà discutude in Consei (al sucedarà in Setembar, al conferme Franzil), «no podaran di che nissun ju veve

informâts e a varan di rispuindi politichementri des lôr azions», al à marcât Puppo. E chei presints? Ce àno dit? «A àn preseât la iniziative, ma la cuestion e je complesse. No je di centri, di drete o di çampe - al à zontât Puppo -. A son divisions trasversâls aes fuarcis politichis. Dal sigûr l'ultin intervent dal president de Region Riccardo Illy (che si è pronuciât pal insegnament de lenghe furlane a scuele cun eventual domande di esonerazion pai contraris, ndr) al pues judâ i conseirs regionai a lâ intune cierte direzion».

Dut câs, e va indenant la petizion «on line» dal Comitât 482 par sensibilizâ la opinion publiche su chest argoment e par demandâ che il Consei regionâl al torni ae propueste di leç di politiche linguistiche fate indenant dal grup di esperts nomenâts de Zonte regionâl. Fin cumò lu àn sottoscrit in plui di cuatricent. A son rivadis adesions di citadins e associazions di altris comunitâts linguistiche europeanis, de Catalogne, de Irlande, de Ingletiere, de Republiche Ceche. «Un numar alt, stant che l'apel al sta zirant di un pâr di setemanis dome su internet». La poie ae iniziative dal Comitât 482 e je rivade ancje dal retôr de Universitât dal Friûl, Furio Honsell, e dal ex president dal Eblul, l'Ufici european pes lenghis mancual dopradis, Dónall O Riagáin. Il test dal apel al è stât dât fûr sù par jù in 2 mil volantins, ancje luns ai 16, ae giave di Tarpezzo a Sant Pieri dal Sclavons, ae jentrade dal spetacul dal Mittelfest «Pe Cjarte universâl dai dirits dal om».

**ERKA ADAMI**

## AL INCUINTRI INFORMATIF SU LA LENGHE FURLANE INMANEÂT DAL COMITÂT 482 A ÀN RISPUINDÛT DOME IN SIET

# Conseirs regionai «latitants»

Cuant che la leç e rivarà in Consei a Setembar «no podaran di che nissun ju veve informâts» al à dit Carlo Puppo